

Segun Roly Bisslik, di AVP:

"Ta birando tempo pa MEP papia berdad riba traficacion den nan tempo"

ORANJESTAD

Despues di analizá e carta cu Rudy Croes a manda pa Promé Ministro, Wim Kok, Roly Bisslik, miembro di Parlamento pa fraccion di AVP, ta mostra cu ta di lamentá pa mira con un ex-Ministro di Husticia, cu mester por sa mihor, ta haci un barbaridad monstruoso asina.

Pasobra mandando un carta asina pa Presidente di Rijksministerraad y cu un halá di copia pa diferente departamento, un biaha mas Aruba su number ta wordo manchá inhustamente.

Sr. Bisslik ta bisa cu cu esaki por mira claramente cu tin un problema serio den nos hendenan di oposicion cu solamente ta wak e interes partidario riba e interes di e pais Aruba.

"Mi por corda bon cla riba e asunto di e Barco Daniel Leo cu sigur ainda e Gobierno di Gabinete Oduber tin cu duna



Roly Bisslik, miembro di Parlamento pa partido AVP

cuenta na e pueblo aki.

E storia di e barco Daniel Leo ta laga masha hopi "oogjes en haakjes" y vraagtekens habrí.

E Gobierno di Nel Oduber tabata na mando e tempo ey. Hendrik Croes tabata Minister di Husticia y despues Rudy Croes a fungi como tal, pero

tambe na e mesun tempo Guardacosta a wordo malamente neglighá!

Un proyecto cu a bin supestamente pa haci un estudio den nos awanan teritorial encunto pesqueria, pero tabata eherciendo esaki den awanan di Surinam y di Colombia.

Ra, ra, ra con por ta posibel?? Aki tin un cos cu ta muestra "fishy".

Tambe nos por a tende di un Cargo-zaak na unda droga den un forma organizá a wordo transportá di Aruba pa Hulanda, cu bendicion di Minister di Husticia y Minister di Asuntonan General Nel Oduber di e tempo ey.

Droga a wordo transportá, placa a wordo invertí, pero con cu bai, con bin tur cos a desaparecé di repente.

Ni na Hulanda ni Aruba nan no sabi di nada.

E persona cu anteriormente tabata hefe di BVD di Hulanda e tempo ey, pa colmo ta e mesun persona cu a bin pa haci un

investigacion aki na Aruba su so.

Te awe ningun hende sa cu kende el a papia.

Awor preguntanan cu a keda atras ta cu si el a bin pa investigá of el a bin pa tapa cos.

Pero tambe aparentemente tabatin un tiroteo ariba lamá cu agentenan di DEA, anto despues e mainta ey, un yate di bela ta drenta lagoen di Savaneta, escoltá pa Marina Hulandes y ta bai mara na Savanetakamp.

Prensa no a wordo permití pa drenta pa haya informacion y pa e dia siguiente e belero a desparcé cu e noorder zon. Ra, ra, ra con ta posibel?

Relacioná cu henter e incertidumbrenan aki, tambeta batin informacionnan den prensa cu un politico cu eventualmente a dera sconde documentonan bao tera den cunucu y cu te awe Pueblo no a tende nada mas di esaki. Ra, ra, ra con ta posibel?

Shonnan, stop di hunga wega politica barata pasobra awendia pueblo conocé boso forma di proceder.

Stop di busca un issue politico cu e buki di Zaandam pa trata di crea un otro ambiente hostil den nos comunidad Arubano y duna Aruba un mal imagen.

Si boso MEP ta kere cu tin evidencia, anto cana e caminda corecto y bai Ministerio Publico y cumpli cu boso deber entregando un keho formal.

Pero no keda sconde tras di shisherianan di un buki

Masha hopi biaha MEP ta papia di entreguista.

Pero awor MEP a bai yora na rudia na mama Hulanda pa bini mete la pata den nos sistema hudicial.

Berguensa boso mester tin. Awe un biaha mas MEP a traicioná Pueblo di Aruba poniendo cara di Rubianonan pasa berguensa internacionalmente", asina sr. Roly Bisslik ta terminá.